



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO



Datë: 07.07.2025
Numër Protokolli: 4604/2025

A.nr.806/2025

Këshilli i Pavarur Mbikëqyrës për Shërbimin Civil të Kosovës–Kolegji për Shqyrtimin dhe Vendosjen e Ankesave, në përbërje nga: Eshref Shabani-kryetar, Ardita Haxhnikaj–Demi dhe Malsore Gashi Bajraktari- anëtarë, me Rushit Kajtazi- në cilësinë e procesmbajtësit, në procedurë sipas ankesës me numër A.nr. 806/2025, të datës 05.05.2025, të parashtruar nga ankuesi G.H, kundër organit të punësimit: Ministria e Financave Punës dhe Transfereve, në çështjen juridike “kontestim konkursi”, duke vepruar në pajtim me nenin 6 paragrafin 1 nën paragrafin 1.2, nenin 16 paragrafi 3 dhe nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180 si dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 07.07.2025, mori këtë:

V E N D I M

I. Aprovohet si e bazuar ankesa nr. 806/2025, të datës 05.05.2025, të parashtruar nga ankuesi G.H.

II. Shfuqizohet Njoftimi i datës 30.04.2025, i Njesisë së Burimeve Njerëzore, ndërsa **Anulohet** në tërësi procedura e rekrutimit e shpallur sipas konkursit të datës 07.03.2025 me numër të Referencës RN00016971 për pozitën “Zyrtar për Administrimin e Dokumenteve” në Ministrinë e Financave, Punës dhe Transfereve.

III Obligohet Sekretari i Përgjithshëm i MFPT-së, që të ndërmerr të gjithë veprimet e nevojshme me qëllim të zbatimit të këtij vendimi si në pikën **III** të dispozitivit, në afatin prej pesëmbëdhjetë (15) ditësh, nga dita e pranimit të këtij vendimi.

IV. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Kandidati për pranim në shërbimin civil, G.H (në tekstin e mëtejme referuar: Ankuesi), me datë 05.05.2025, përmes emailit zyrtar ankesa.kpmschck@rks-org.net, ka parashtruar ankesë për Këshillin e Pavarur Mbikëqyrës për Shërbimin Civil të Kosovës e cila është regjistruar nën shenjën A.nr.806/2025, kundër procedurës së rekrutimit me shifër RN00016971 për Grupin e Arkivit për pozitën Zyrtar për Administrimin e Dokumenteve Zyra Lokale e Pensioneve në Prishtinë të shpallur nga Ministria e Financave, Punës dhe Transfereve.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: Këshilli) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datën 19.05.2025 ka proceduar kërkesën për përgjigje në ankesën tek Ministria e Financave Punës dhe Transfereve, ndërsa kjo e fundit, më datë 23.05.2025 ka dorëzuar përgjigjen në ankesë se bashku me shkresat e bashkangjitura të lëndës.

Kolegji për Shqyrtimin dhe Vendosjen e Ankesave administroi këto prova: Ankesën A. Nr.806/2025 të datës 05.05.2025; drejtuar Këshillit të Pavarur Mbikëqyrës për Shërbimin Civil të Kosovës; Njoftimi i datës 17.04.2025; Konkursi me numër referencë RN00016971, i datës 07.03.2025; Kopje e letërnjoftimit për ankuesin; Kërkesë për përgjigje në ankesë e datës 19.05.2025, dërguar nga R.K, për K.D; Përgjigje në ankesë me numër protokolli 806/2025, e datës 23.05.2025; Vendimi me numër protokolli 12004, i datës 17.04.2025, për Themelimin e Komisionit i nxjerr nga Sekretari i Përgjithshëm i Ministrisë së Financave Punës dhe Transfereve; Akt Emërimi me numër protokolli 935/2025, për B.H; Akt Emërimi me numër protokolli 1982/2024, për A.T; Akt Emërimi me numër protokolli 2341/2024, i datës 16.08.2024, për H.R.R; Akt Emërimi me numër protokolli 1043/2024, i datës 04.05.2024 për L.H; Akt Emërimi me numër protokolli 2008/2024, i datës 13.08.2024 për J.H; Lista e Aplikantëve; Aplikacioni i G. H, me shkresat e bashkangjitura; Diplomë me numër protokolli 1349, e datës 05.11.2020 për G.H, e lëshuar nga Universiteti i Prishtinës ‘‘ Hasan Prishtina’’; Certifikatat e ankuesit G.H; Vërtetim i datës 13.09.2018; Vërtetim i datës 17.12.2024; Aplikacioni i R.G, me shkresat e bashkangjitura; Diplomë me numër protokolli 2876, e datës 01.11.2013 për R.G, e lëshuar nga Universiteti i Prishtinës ‘‘Hasan Prishtina’’; Pasqyra e trustit për periudhën nga data 16.02.216, deri me datën 01.04.2025, për R.G; Vërtetim i datës 03.04.2025; Kopje e letërnjoftimit për R.G.

Kolegji i Këshillit nga administrimi i shkresave të lindës të ofruara nga palët në procedurë, ka konstatuar se ankesa e ankuesit, është e **bazuar**, sepse:

Nga administrimi i shkresave të lëndës, Kolegji i Këshillit konstatoi se MFPT, më datë 07.03.2025 ka shpallur konkursin me numër reference RN00016971, për Grupin e Arkivit, pozita “Zyrtar për administrimin e dokumentit” klasa e pozitës Profesional 2”, numri i kërkuar 1, në Departamentin e Ministrisë së Financave, Punës dhe Transfereve , ku afati për aplikim ka qenë nga data 08.03.2025 deri më 06.04.2025, ndërsa sipas shkresave të lëndës, në këtë konkurs fazën e verifikimit paraprak e kanë kaluar vetëm 31 kandidatë, ndërsa ankuesit i është refuzuar aplikacioni i tij.

Tutje, Njësia e Burimeve Njerëzore, përmes Njoftimit të datës 17.04.2025 ia ka refuzuar aplikacionin ankuesit me arsyetimin se i mungon kualifikimi i kërkuar: Juridik, Histori, Letërsi, Arkiviste, Orientalistike, Antropologji dhe Ballkanistikë të kërkuara sipas kërkesave dhe kriterëve të përgjithshme të konkursit .

Ankuesi në ankesën e parashtruar në Këshill pretendon se procedurat e rekrutimit është zhvilluar në kundërshtim me nenin 7 të Rregullores 15/2023 për Procedurën e Pranimi në Shërbimin Civil si dhe nenin 9 të Ligjit Nr.08/L-197 për Zyrtarët Publik.

Kolegji i Këshillit, në kuptim të shqyrtimit të pretendimeve ankimore dhe duke u bazuar në kuadrin ligjor të fuqi, ka analizuar ligjshmërinë e procedurës së pranimi me Nr. reference RN000169971, për **Grupi i arkiv -Dokumentacionit**, pozita “*Zyrtar për administrimin e dokumenteve*” në Prishtinë ka konstatuar se për këtë pozitë të punës si kërkesa të përgjithshme formale janë përcaktuar: **Arsimimi i kërkuar:** *Diplomë e arsimit të lartë e nivelit të parë (Bachelor)*; **Përvoja e punës e kërkuar:** *Së paku një (1) vit përvojë pune profesionale në fushën për të cilën zhvillohet procedura për plotësimin e pozitës së lirë të punës*”.

Kolegji i Këshillit përpara se të lëshohet në shqyrtimin e pretendimeve të tjera ankimore të ankuesit, mori përbazë Vendimin Nr.08/226 e të datës 23.10.2024 të Qeverisë së Republikës së Kosovës, ku përmes pikës 1 të dispozitivit është aprovuar Katalogu i Vendeve të Punës për Shërbimin Civil, ndërsa sipas pikës 6 të dispozitivit të të njëjtit vendim përcaktohet fakti se vendimi në fjalë hynë në fuqi ditën e publikimit në gazetën Zyrtare të Republikës së Kosovës, dhe për rrjedhojë u konstatua fakti se Vendimi Nr.08/226 i datës 23.10.2024 i Qeverisë së Republikës së Kosovës, është publikuar në gazetën zyrtare me datë 23.10.2024, nga rrjedh se i njëjti ka hyrë në fuqi me datë 23.10.2024, ndërsa konkursi në fjalë është shpallur pasi ka hyrë në fuqi Katalogu i Vendeve të Punës për Shërbimin Civil, përkatësisht më datë 07.03.2025.

Duke marrë përbazë Katalogu i Vendeve të Punës për Shërbimin Civil, të aprovuar sipas Vendimin Nr.02/226 e të datës 23.10.2024, Kolegji i Këshillit konstatoi se pozita *Zyrtar për administrimin e dokumenteve*, klasa Profesional 2, identifikohet në kuadër të grupimit **Grupi i arkiv-it-dokumentacionit**, kurse fusha e kërkuara e arsimit përcaktohet të jetë: **Juridik, Ekonomik (pa specifikim), Sociologji, Antropologji, Filozofi, Histori, Shkenca Politike, Psikologji, Punë Sociale, Gjeografi, Administratë Publike.**

Në këtë kuptim, Kolegji i Këshillit duke u bazuar në dispozitat e aplikuara të nenit 19, si dhe nenit 31 paragrafi 1 dhe 2 Rregullores (QRK) Nr. 06/2024 Për Klasifikimin e Vendeve të Punës në Shërbimin Civil ku përcaktohet se: “19. Kërkesat e përgjithshme formale, **përfshijnë arsimin**, përvojën e punës profesionale dhe/apo aftësitë e kërkuara për pozitën, kategorinë, klasën apo grupin përkatës që janë të domosdoshme për kryerjen me sukses të detyrave dhe përgjegjësi; 30.1. Me qëllim të lehtësimit të procesit të klasifikimit dhe grupimit të vendeve të punës për kategorinë profesionale, hartohet katalogu i vendeve të punës në pajtim me këtë Rregullore dhe miratohet nga Qeveria, me propozim të Ministrisë

Përgjegjëse për Administratë Publike. 30.2. Katalogu i vendeve të punës përmban emërtimin e pozitës, kategorinë, klasën, grupin dhe kriteret e përgjithshme si dhe përshkrimin e vendit të punës për çdo pozitë.”, konstatoi se Ministria e Financave shpalljen e konkursit RN00016971 të datës 07.03.2025 për pozitën “Zyrtar për administrimin e dokumenteve” e ka shpallur në kundërshtim me Katalogun e Vendeve të Punës për Shërbimin Civil, i aprovuar dhe i cili ka hy në fuqi me datë 23.10.2024 sipas Vendimit Nr.08/226 të Qeverisë së Republikës së Kosovës si dhe në kundërshtim me dispozitat e cekura si më lartë të Rregullores (QRK) Nr. 06/2024 Për Klasifikimin e Vendeve të Punës në Shërbimin Civil ndërlidhur me Shtojcën Nr.2: Grupet Tip të administrimit të përgjithshëm dhe posaçëm, pasi që pozita në fjalë “Zyrtar për administrimin e dokumenteve ” hynë në kuadër të grupimit **Grupi i arkivi-dokumentacioni**, dhe për rrjedhojë pozitës në fjalë i janë ndryshuar edhe kriteret e përcaktuara të kualifikimit arsimor të cilat janë të përcaktuara sipas rregullores së lartcekur dhe Katalogut të Vendeve të Punës për Shërbimin Civil, nga rrjedh se procedura e rekrutimit është zhvilluar në kundërshtim me nenin 7 paragrafi 1 të Ligjit Nr.08/L-197 për Zyrtarët Publik, me nenin 19 dhe nenin 31 paragrafi 1 dhe 2 Rregullores (QRK) Nr. 06/2024 Për Klasifikimin e Vendeve të Punës në Shërbimin Civil.

Andaj, duke marrë për bazë konstatimet e dhëna si më lartë, dhe meqenëse Kolegji i Këshillit konstatoi se në këtë procedurë të rekrutimit shkeljet janë evidentuar qysh me rastin e shpalljes së konkursit të datës 10.12.2024, ashtu që nuk janë përfillur kriteret e aprovuara lidhur me grupimin e pozitës, duke ndryshuar më pastaj edhe kriteret për fushën e kualifikimit arsimor për pozitën *Zyrtar për administrimin e dokumenteve* duke u bazuar në dispozitat e nenit 53 dhe nenit 55 paragrafi 1 të Ligjit Nr.05/L-031 për Procedurën e Përgjithshme Administrative, me qëllim të kthimit të ligjshmërisë vendosi sikurse në dispozitivin e këtij vendimi që të anuloi konkursin e datës 07.03.2025 me numër të Referencës RN000169771 për pozitën *Zyrtar për administrimin e dokumenteve* në Ministrinë e Financave, Punës dhe Transfereve/ Zyra Lokale e Pensioneve në Prishtinë si dhe të shfuqizoi çdo akt dhe veprim tjetër procedural që ndërlidhet me konkursin në fjalë.

Kolegji i Këshillit thekson faktin se meqenëse konstatoi paligjshmërinë e aktit të shpalljes së konkursit në fjalë, nuk u lëshua në shqyrtimin e pretendimeve të tjera ankimore të ankueses të parashtruara si në ankesën e datës 05.05.2025, pasi që konstatimi nëse pretendimet janë apo jo të bazuara nuk do ta ndryshonin natyrën vendimmarrëse të kësaj çështje administrative, ndërsa ankesa e ankuesit është aprovuar vetëm për arsyet e dhëna si në arsyetimin e këtij vendimi.

Kolegji i Këshillit thekson faktin se duke u mbështetur në dispozitat e nenit 21 paragrafi 1 dhe nenit 24 paragrafit 1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180, ku përcaktohet se: “21.1. Vendimi i Këshillit është vendim administrativ i formës së prerë dhe zbatohet nga zyrtari i nivelit të lartë drejtues ose personi përgjegjës i institucionit që e ka marrë vendimin e parë ndaj palës; 24.1. Në rast të moszbatimit të vendimit të Këshillit sipas nenit 21 të këtij ligji, Kryetari i Këshillit nxjerr vendim për ndalimin e 50 % të pagës mujore për personin përgjegjës, deri në zbatimin e vendimit të Këshillit.”, në rast se Vendimi i Këshillit nuk zbatohet sipas dispozitivit të përcaktuar, ndaj personit përgjegjës i përcaktuar në pikën IV të dispozitivit të këtij vendimi, do të merren masa përkatëse në pajtim me nenin 24 paragrafi 1 të të njëjtit ligj.

Andaj, duke u bazuar në nenin 6 paragrafi 1, nën paragrafi 1.1, nenin 18 paragrafi 1 nën paragrafi 1.2 të Ligjit Nr.06/L-048 për Këshillin e Pavarur Mbiqyrës për Shërbimin Civil të Kosovës, Kolegji i Këshillit vendosi si në dispozitiv të këtij Vendimi.

Këshillë juridike: Vendimi hyn në fuqi ditën e nënshkrimit nga Kryetari i Kolegjit. Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë–Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

KËSHILLI I PAVARUR MBIQYRËS PËR SHËRBIMIN CIVIL TË KOSOVËS
Lënda me numër A.nr. 806/2025

Rushit Kajtazi

Procesmbajtës

Eshref Shabani

Kryetar i Kolegjit

Vendimi i dërgohet:

- Ankuesit, G.H;
- Divizionit për Burime Njerëzore në Ministrinë e Financave Punës dhe Transfereve;
- dhe Arkivit të KPMSHCK-së